

編號 1 號

【自家大自家】林伯殷原作

該個人係麼儕？仰會電視逐日有佢个新聞？仰會有恁多人請佢簽名？仰會有恁多人聽佢演講？係哪齣電影个明星？係哪個有名个歌星？抑係哪種職業運動个球星？全毋係。佢係一間有名公司个執行長，來臺灣摺大家分享人工智慧个發展，同時，乜有其他重要晶片公司个執行長，來參加臺北電腦展个活動。仰般佢兜會跔跔對外國來到臺灣呢？當然有理由啊！該就係，臺灣有全世界最先進、最完整个晶片製造系統。

在世界晶片个分工系統肚，臺灣最強个部分係晶片製造，差毋多，最新設計个晶片，全部係交分臺灣來生產。現代晶片个發展係越做越幼秀，功能越來越強。晶片製造公司為著愛開發新个製造技術，長下會投資大量資金，集合幾下百、甚至幾下千儕來做研究，就係講，愛大自家為共同个目標來打拚正有法度做得著，這摺單淨倚恃自家煞猛做頭路來講，有當大个爭差。

所以，有名个晶片公司執行長毋會斯強調自家公司產品个成功定定，還會記得承蒙好得有臺灣恁湛斗、恁有紀律个晶片生產團隊來幫襯。見擺上下班時間，想著該恁多在科學園區來來去去

个人，就知，係無大自家个努力，臺灣仰會有恁好个晶片製造能力，仰會受著國際个恁多肯定。

隨等晶片个用量緊來緊大，恁多年來，幾多原旦係客家人耕種个山林、農田，既經變做電子廠摺大樓，想看一下頭播播做事个農家人，來思念自家个長輩斯無恁該。毋過，這種自家認分，頭播播摺事情做好，堅耐个精神，對農業時代變到資訊時代後並無失忒去，像人乜毋識離開過原來个所在，還係日合夜繼續留在廠房裡肚。這兜摺臺灣合作个晶片公司執行長，認為自家堅耐个傳統，就係臺灣晶片製造个正經基礎。

現代工業產品已經離毋開晶片咧，臺灣个晶片公司乜有去到美國、日本、德國等先進國家設廠，偲俚个工程師跔等去到世界各地，大自家摺晶片製造技術傳揚出去个時節，乜分人更加有機會做得來感受著臺灣人自家个堅耐精神。

114 年全國語文競賽臺灣客語朗讀文章高中學生組（海陸腔）

編號 2 號

【目汁个故事】徐秀英原作

該日下晝，看著一張當錫人个圖像——顯微鏡底下个目汁花。逐張目汁花看起來斯像一隻細星球，頂高个花紋逐隻斯無共樣，有像雪花形个，有像石英結晶體个，乜有像弄毛蟲个，又神奇又得人惜。攝影个作者講，逐滴个目汁，用目珠看起來都係晶亮晶亮，毋過在顯微鏡底下，喜怒哀樂个情緒變化都會出現無共樣个目汁花。對看著這篇文章以後，逐擺看著人出目汁，就會緊想佢背後个故事。

佢係一個「噉點」當低个人，歡喜會流目汁、感動會跌目汁；當關个時節會噉、悲傷个時節會大噉。屋下人長下笑佢，目珠有安水龍頭，一擰開斯嘩啦啦緊流，毋過難免會堵著噉無目汁个時節。斯像有一擺用電腦打報告，作業速度一路開青燈，就在會完成个時節電腦嘎當機，看等烏疏疏个屏幕，就像佢烏疏疏个失落心情。等到再過開機，資料斯伸著一半，該兩時就恁樣目金金仔奈佢毋何。看著在三更半夜，歸屋下人睡到當落覺，伸佢緊擘嘴，緊流下知差个目汁。

目汁係佢們外背聯絡情感个一種表達方式。所以，所有个

痛惜、期盼、悲傷、感動摻夢想个故事，都做得真實傳達。在佢們个生活裡背，輒常乜會在車頭抑係機場，看著一幕幕無共樣个場景。該片有人送別親人遠去他鄉，離別个目汁張等思念摻期待，還較多个係掛吊摻毋盼得；這片有人插等轉來个好朋友，該歡喜个目汁裡背，淪淪都係再過重逢个快樂摻幸福。佢想，目汁毋單淨係情感个出口，還有一種無形个力量，佢做得穿過時空，傳達溫暖摻勇氣分思念个人。每一滴感動个目汁，都係關愛个力量摻信念。

還細時節，自家當會用使頓屈、打潑賴，去得著想愛个東西。阿姆講，目汁毋係武器，乜毋應該係手段。這下佢知咧！目汁係珍珠、係鑽石、係親戚朋友無瑕个愛。

編號3 號

【聽古】廖惠貞原作

還細時節戴姐公屋脣，跔等阿太、阿婆行。阿太成時會渡一、兩個息嫲坐三輪車轉去海口佢个外家，在漁港擺一大籃魚仔轉來。無食忒个，舅姆會用鹽滷變鹹魚，做得食幾下日。

還記得熱天食飽夜，在天時坪，阿姨摺草蓆鋪好，交椅、矮凳仔徙好，伙房个叔婆、伯公乜擎等葵扇出來寮涼。阿太、阿婆在該擘地豆，成時細孺仔乜會搵手。細舅會摺地豆擘一半，夾在偃兜耳砵做耳環戴，愛靚斯毋會試著痛。莊肚一大遍都係田，世大人大概會講耕種个事情，弓蕉仰般翕分佢熟？洋菇愛仰般淋水？打胎个禾仔嘎分塑膠工廠噴煙，禾串冇忒愛仰結煞？三姑婆个豬嫲愛降子囉！無斯講頭擺个事情，搞寮个細人仔會停下來，耳角角仔聽，因為大家斯好聽古，尤其係阿定伯公來寮个時節。

有一擺阿太老癩俵，玄風講愛渡偃兜去海口捉魚仔，堵好該暗晡阿定伯公來寮，佢乜講頭擺戴在新屋永安漁港脣，還細時節，臨暗仔輒輒會跔等大人去沙灘牽罟<sup>1</sup>捉魚仔，阿公先問：「阿定哥，你兜仰般知愛去牽罟呢？」

<sup>1</sup> 牽罟：音 kien` gu`；以漁船、曳地網、人力合力捕魚的方式。

「有里長伯會歎嘍<sup>2</sup>啊！」阿定伯公驚大家毋知歎嘍个意思，又解釋講：「大海螺个尾削忒兜仔，對尾大聲歎，就有嘍嘍嘍——一个聲，大細聽著嘍嘍聲斯遽遽走出來搵手，分做兩片拉網，嘴町大聲緊喊『一、二、三，大力拉！』該搭仔海陸人較多，大家都講牽罟。」

「阿定伯公，係恁樣牽罟無？」細舅當興頭做出拉網動作，大家哈哈笑。

因為一般客人都戴在山頂，人講：「逢山必有客，無客不戴山。」雖然還細識去海口漁港，毋過無看過牽罟。阿定伯公講：「偃俚客家人當擔硬，靠山食山，靠海食海，鄰舍摺屋下人半耕種半打漁，生活還過得去，乜愛靠天公爺摺祖先个保庇，所以偃俚客人尊敬天，感恩田地、大海摺祖先哦！」大家都聽到當入文。

聽阿定伯公講古，想像佢兜協力耕山耕海久遠个古，有節奏个海螺歎嘍聲，大家共下出力牽罟收魚仔，看等彩霞染等海面、日頭落海肚，歡喜講笑平分魚仔，家家屋屋都有豐沛个暗餐，這係頭擺漁村生活幫搵个記憶。聽阿定伯公講老頭擺个古，感受著客家硬頸打拚个精神。

<sup>2</sup> 歎嘍：音 pun du；吹海螺。